

Naqqiut

(EM 2015/94/95, ulloq 22-10-2015-imeersoq Naalakkersuisut akissuteqaataat taaserpaa)

Eqqagassat pillugit nalunaarusiap nalilersorneqaqqinnissaa pillugu Naalakkersuisunut inassuteqaateqarnissamik Inatsisartunut aalajangiiffigisassatut siunnersuut, tamatumani kommunit inuit tamat ingerlaarfiini illoqarfinni nunaqarfinnilu sumiiffinni cigaretsit sinnikuinut eqqaavissanik matoqqasunik ikkussuinissaanik peqqussuteqarnissaq pillugu siunnersuut.
(Inuit Ataqtigiit Inatsisartuni ilaasortaataitai)

Akissuteqaat

(Pinngortitamut, Avatangiisinut Inatsisinillu Atuutsitsinermit Naalakkersuisoq)

Siullermeerneqarnera

Naalakkersuisut sinnerlugit siunnersuummut qujavunga.

Naalakkersuisut isumaqatigaat cigaretikut maaniinnaq takussaavallaartut. Kommunit eqqakkat salinnissaat piiarnissaallu akisussaaffigaat, Namminersorlutik Oqartussat qitiusumik inatsit atortinneqartut akisussaaffigaat allatigullu eqqaavilerisarneq malinnaavigissallugu.

Naalakkersuisut eqqaavilerisarneq pillugu nalunaarusiap nutarternissaanut siunnersuut tusarniutigalugu nassiteqqammerpaat. Nalunaarusiap nutarternissaanut siunnersuutip nutaap maannakkut nalunaarusiat atuuttut marluk 1993-imeersut eqqakkanik uuliakunik akuutissanillu igitassanik eqqaasarneq ataatsimoortilissavai. Peqatigisaanik siunnersuut sinaakkutissanik eqqaavilerisarnermi naleqqunnerusunik pilersitsissaaq, tassani igitassanik eqqaasarneq kisimi pineqanngimmat nalinginnaasumilli eqqakkanik suliaqarneq tamarmi pineqarluni. Naalakkersuisut cigaretikut pillugit ajornartorsiutit arajutsisimangilaat. Tamanna pillugu kommunalbestyrelsit inuit tamat ingerlaarfiini illoqarfiit nunaqarfiillu iluini arsakoofinnik ikkussuissasut peqqussummik siunnersuut imaqarpoq.

Naalakkersuisut kissaatigaat innuttaasut eqqakkat cigaretikullu iginninnissaannut periarfissarissaarnerulernermikkut nalujunnaassagaat tamatta peqataanitsigut Kalaallit Nunaat paarilluarlugu pisinnaagippat. Taamaammat suliniut 'Qujanaq' ukioq manna ingerlaqqissaaq.

Oqaaseqaatit saqqummiunneqartut tunngavigalugit Naalakkersuisut sinnerlugit inassutigissavara, aalajangiiffigisassatut siunnersuut itigartinneqassasoq, tassami Naalakkersuisut eqqagassat pillugit nalunaarut iluarsisaq tusarniaassutigalugu nassiunneqareerpoq, taannalu ilaatigut arsakoofinnik ikkussuinissaq pillugu siunnersuummik imaqarpoq.